

Greti Widauer, Maria Alm *S'Flickkörbei*

S'Flickkörbei is früahaszeitn oans va dö wichtögöstrn Sachn an Haushalt gwen, und heint? Wer flickt denn no? Wer ko an Fleck onla einstuckn, wer an Hosnsaock einnahm, Händleng bsetzn, an Mannaleitpfoadnkraogn und a Plastron aufnahm? So a Flickkörbi is an a niadn Bauanstubn an Wondkastl oda aufn Fenstasteun gstonndt. A's is rund gflochn, ohne Henkel und van eweng Drumgreifn dö mehra weil auf oana Seit hin gwehn, aba säubalich mit an Flickfleck ausbessascht wordn. Vü haot Plaotz ghaob drein: a nettla Spulen weißn und schwaschzn Flick- und Maschinzwirn hombs euwei braucht, a Knoiei Leinenzwirn, feinst aus Flachs gspunna und dreifadög zommlasn, a Imbnwaxkügei zan Faodn einreibn, dass a nid fronsascht, bua, a soichana haot herg'haob, den hättst mit dö Zänd nia aodabissn, guat zan Strohsöck zommnahn, ba dö harwan Leintüacha, ban Hosnflickn, ban Händleng bsetzn, zan Salzsöck zommnahn haot a's so ebbas

oafach braucht.

Feine und grobe Nahnadln, Flicknadln, Stoppnadln, Naoc haot d'Sattler- und d'Schuastanadl g'hoasen. Unt inn sand Stecknadln, Sperrnadln, Glifei, Haggei und Müadal, Druckal, große und kloane, Knöpf eu Gattenga, a Scha, a Fingahuat, a Stoppa mit an Griff zan ochaschraufn, a Mörkgaohn, a fi dö Deanstbotn, dass ea Arbötszoig und Gwondt nit vawexlnd. Van Schneuztüachö, da Pfoad, an Gwondt, bis za dö Sockn und Händleng is eus gmörkt gwehn.

Hiaz is ma no eingfeun, dass ebba a Messbandl und a Trümö Schneidakreidn a no vahondtn gwehn is. Hoast ebbas braucht, is dös gwiß z'untaröst untinn, dao muaßt a Bois umruaschn, bis dös Grecht hergeht. Fallt da aba dös Flickkerbö ausn Händtn und leid eus a da Strahleitn aufn Bodn, brauchts a Geduld, bis'd dös Gezamslwerch wieda eidaklaub haost.